

## धिमय-पौ (Dhimay-Pau)

दं १३ थ्यंल्या: ६२

ने.सं. ११३५ गुंला - ११३६ सिल्ला

२०७२ श्रावण-२०७२ माघ

पिकाक:



ज्यापु समाज, यल

प्रकाशन व प्रचार प्रसार उपसमिति

धिमय-पौ पिथना पुच:

भोलगणेश, यल फोन : ५५४४८५७, ५५४४८४४

ईमेल : info@jyapusamaj.org.np

Website : www.jyapusamaj.org.np

प्रबन्ध निर्देशक

सरिता महर्जन

प्रधान सम्पादक

तुलसीलाल सिंह

कार्यकारी सम्पादक

काजीमान डंगोल

सम्पादक

एलिना महर्जन

व्यवस्थापक

नबिन्द्र महर्जन

आर्थिक नियन्त्रक

नरेश महर्जन

बजार प्रबन्धक

बिनोद महर्जन

किपा

किशोर महर्जन, सानु महर्जन

राजु महर्जन

ई-धिमय-पौ डेभलपर

सुनिल महर्जन

कम्प्यूटर/छपाई

आइडियल प्रिन्टिङ्ग प्रेस

ग्वार्को, यल, २१२०२३५

## ■ सम्पादकीय ■

### समाजया ज्यासना पुच:पाखे

### ग्वाहालिया अपेक्षा

धिमय-पौ पिमदंगु थ्यंमथ्यं थनिं खुला दत । निलापौ जुयाः  
पिदनेमाःगु पत्रिका खुलालिपा तिनि पिदनेगु धइगु तस्सकं लिबाक्क  
पिदंगु खः । थथे इलय् पिमदंगु अनेक कारण दु । उकिमध्यय्  
आन्तरिक कारण मू कारण खः ।

वंगु तःमुँज्याया तयारी इवल्य् स्मारिका पिथनेमाःगुलिं  
उकिया नितिं यक्व ई काल । थ्व स्मारिका विशेष संस्करण यानाः  
पिथनेमाःगुलिं नं आपालं च्वमिपिनिगु लेख-रचना दुथ्याकेमाल । व हे  
कारण उकिया नितिं यक्व ई बीमाल । अनलिपा 'समाज'या तःमुँज्या  
जुल । तःमुँज्यां न्हूगु ज्यासनापुचः ल्यय्माल । न्हूगु ज्यासनापुचःया  
थीथी उपसमिति दय्का कार्यविभाजन नं याय्माल । कार्यविभाजन  
यानाः नं थीथी उपसमितिइ दुजःत नं ल्यय्माल । थुकथं प्रकाशन  
तथा प्रचार-प्रसार कवःया दुजःपि ल्ययाः नं थुगुसी 'धिमय-पौ' पिथना  
पुचः'या दुजः व कार्यविभाजन नं याय्माःगु ताःहाकःगु प्रकृयां यानाः  
थुगु अंकया धिमय-पौ पिथनेगु ज्या लिपालाःगु खः । आवलि थजाःगु  
ताःहाकःगु प्रकृयाया भमेलाय् लाय्म्वाःल धाःसा धिमय-पौ पाय्छि  
इलय् पिथने फइगु विश्वास याय्फु ।

धिमय-पौ पिथनापुचःया न्हूगु पुचलं पाय्छि इलय् पिथनेगु  
कुतः जुइ । थुकिया नितिं अनेतनेगु कार्ययोजनया ताताःहाकःगु  
खँ ल्हाय्गु सिबे निलाय् छगू अंक पत्रिका पिथनेगु न्हापांगु कुतः  
जुइ । थुकिया नितिं समाजया ज्यासनापुचःया ग्वाहालि नं उतिकं  
हे आवश्यक जू । आसा याय्, समाजया ज्यासना पुचलं धिमय-पौ  
पुचःयात माःकथं स्वायत्तता व स्वतन्त्रता बियाः ग्वाहालि याइ धकाः  
आसा याय् ।

अन्तय् ज्यापु समाज, यलया च्याकःगु तःमुँज्यां निर्वाचित  
जुयादीपि न्हूगु कार्यसमितिया पदाधिकारीपि सकसित भिन्तुना व  
बधाई देछानाच्चना नापं वय्कःपिनिगु कार्यकाल सुथालाय्मा धका  
कामना याना ।



# नेवा: बौद्धधर्मया अध्येता जोन लक

♦ समसामयिक

✍ रवि शाक्य, इखाउँ, यल ।



It is not an exaggeration to say that John Locke founded the field of Newar Buddhist studies.

- Gregory Sharkey

नेवा:तय्सं हनावयाच्चंगु वज्रयानी बौद्धधर्मया थःगु हे विशेषता दु । भारतय् वज्रयान न्हनेधुंकाः नेवा:तय्सं उकियात संरक्षण यानावयाच्चंगु खः । तर नेवा:तय्सं हनाच्चंगु वज्रयानी बौद्धधर्म व मूलभूत वज्रयानी बौद्धधर्मया दथुइ आपालं भिन्नता दु । नेपा:गालय् च्वंगु हिन्दूधर्मनाप समन्वय यानाः म्वाय्मा:गुलिं मूलभूत वज्रयानया दर्शनय् हिन्दूधर्मया सम्मिश्रण जुयाः नेवा: बौद्धधर्म पिदंगु खः ।

नेवा: बौद्धधर्मबारे ब्रायन हजसन, इभान पाब्लोभिच मिनायफ, हेनरी एम्ब्रोज ओल्डफिल्डनिसै कयाः आपालं विदेशी विद्वान्पिसं अध्ययन यानावनेधुंकूगु दु । वय्कःपिमध्ये नेवा: बौद्धधर्मया प्राज्ञिकस्म अध्ययन-अनुसन्धान याःम्ह न्हापांम्ह अध्येता जोन लक खः । वय्कःया पूरा नां John Kerr Locke खः ।

वय्कःया नांया ल्यूने S. J. स्वानातःगु दइ गुकिया विस्तारित स्म Society of Jesus खः । थःगु नांया ल्यूने S. J. चयातइपिं जेसुइट क्याथोलिक पादरी खः ।

## प्रारम्भिक जीवन व नेपाल प्रवेश

जोन लकया जन्म अमेरिकाय् जूगु खःसां वय्कलं नेपा:यात थःगु कर्मभूमि दय्काः नेवा: बौद्धधर्मया अध्ययनय् थःगु जीवन फुकादिल । वय्कःया जन्म



जोन लक  
साभार - ओवेन्स, २०१९:१३५

अमेरिकाया शिकागोय् ईसं १९३३ स जूगु खः । वय्कः न्हय्दँ दुबलय् हे मांम्ह मदुगुलिं केहँयात नापं ब्वनाः ककाया छँ Iowa राज्यया Des Moines य् च्वंभाल । अन हे च्वनाः ईसं १९५० य् माध्यमिक तर्गितकया अध्ययन क्वचाय्कादिल । अनलि हाकनं शिकागोय् वयाः लोयोला विश्वविद्यालयय् ब्वनादिल । तर अध्ययनयात न्हयाकाच्चँ ईसाई धर्मया प्रचार याइगु जेसुइट मिसनय् दुहांभाल । ईसं १९५८ स उगु हे विश्वविद्यालयपाखें विलियम वर्डस्वर्थया Lucy Poems य् शोध-प्रबन्ध च्वयाः स्नातकोत्तर यानादिल । इण्डियाना राज्यय् च्वंगु West Baden College पाखें ईसाई दर्शनया अध्ययन व जेसुइट धर्मप्रचारकया प्रशिक्षण क्वचाय्कादिल । अनलि ईसं १९५७ स लकयात ईसाई धर्मया प्रचार याय्गु ज्याय् खटेयानाः भारतय् छ्वल ।

भारतय् अमेरिकी मिसनरीतय्त ताःईतक च्वनेगु भिसा काय्त थाकुगुलिं छुं ई भारतय् च्वनाः ईसं १९५९ स नेपाल भायादीगु खः । उबलय् नेपा:या मिसनरीया ज्या स्वयाच्चंम्ह गोदावरी स्कूलया संस्थापक Father Marshall Moran खः । ईसं १९४९ स पटना विश्वविद्यालयया उपकुलपतिया प्रतिनिधित्व यानाः त्रिचन्द्र कलेजय् परीक्षा काय्त वःबलय् मोरानं ईसाई धर्म प्रचार याय्गु मिसन स्थापना याःगु खः । लकं नेपालय् च्वनाः



धर्मप्रचार व अध्यापनया ज्या न्ह्याकादिल । व हे इवल्य वय्कलं खय्भाय् नं बांलाक सय्कादिल । अनंलि धर्मसम्बन्धी दुग्यंक अध्ययन याय्त भारतया दार्जिलिङ्ग्य भायादिल । धर्मप्रचारया ज्याय् भारतया विहार राज्यया बेतियाय् भाःबलय् पृथ्वीनारायण शाहं देसं पितिनाछ्वःपि नेवाः ईसाईत नापलात । इपिमध्ये छम्ह बुरां बांलाक हे नेवाःभाय् ल्हाय्सःनिगु जुयाच्चन । उगु भ्रमणधुंकाः नेवाःतय्गु बारे अध्ययन याय्गुपाखे वय्कःया नुगः क्वसाल ।

भारतं नेपालय् लिहांवय्धुंकाः गोदावरीया सेन्ट जेभियर्स स्कूलय् अध्यापन यानादिल । वय्कलं ईसं १९६६-७० तक उगु स्कूलया प्रिन्सिपल जुयाः नं ज्या यानादिल । वय्कःया कार्यकालय् गोदावरीइ च्वंगु सेन्ट जेभियर्स स्कूलय् प्राथमिक तर्गिया कक्षा जक संचालन याय्गु यानाः माध्यमिक तर्गियात ज्यावलाखेलय् ल्हय्यगु ज्या जूगु खः । थःगु स्कूलय् ब्वनाच्चपि नेवाः विद्यार्थीनाप खँल्हाबल्हा यानाः वय्कलं नेवाःतय्गु समाज, नेवाःतय्गु धर्मबारे आपालं जानकारी मुंकादिल । विशेष यानाः नेवाः बौद्धतय्सं हनाच्चंगु धर्म, रितिथितिबारे सामग्री मुंकादिल ।

### प्राज्ञिक अध्ययन व योगदान

थःगु औपचारिक अध्ययनयात न्ह्याकेत वय्कलं स्कूलया जिम्मेवारी त्वःताः त्रिभुवन विश्वविद्यालयया नेपाल र एशियाली अध्ययन संस्थान (लिपा नां हिलाः 'नेपाल र एशियाली अनुसन्धान केन्द्र' / CNAS जूगु) स स्नातकोत्तर तर्गिमय् अध्ययन यानादिल । वय्कलं डा. हितनारायण भा (ईसं १९७० स पिदंगु *The Licchhavis* सफूया च्वमि) या निर्देशनय् बुंगद्यःबारे शोध-प्रबन्ध च्वयाः स्नातकोत्तर पूर्वकादिल । उगु शोध-प्रबन्ध नेपाल र एशियाली अध्ययन संस्थानपाखें ईसं १९७३ स *Rato Matsyendranath of Patan and Bungamati* नामं प्रकाशित जूगु दु ।

लकं स्नातकोत्तरया अध्ययन क्वचाय्काः लण्डनया School of Oriental and African Studies (SOAS) स दच्छि ज्या यानादिल । अन वय्कलं *Buddhist Himalaya* सफूया च्वमि नांजाःम्ह नृतत्वशास्त्री David Snellgrove नापलानादिल । थ्व हे दथुइ ईसं १९७६ स वय्कलं थःगु अमेरिकी नागरिकता परित्याग यानाः नेपाली नागरिकता कयादिल ।

थःगु अध्ययनयात निरन्तरता बीगु इवल्य लकं त्रिभुवन विश्वविद्यालयया संस्कृति विभाग अन्तर्गत च्वनाः विद्यावारिधिया लागि अनुसन्धान न्ह्याकादिल । विद्यावारिधिया लागि वय्कलं थःगु स्नातकोत्तर तर्गिया शोध-प्रबन्धया बुंगद्यःया विषययात हे विस्तृतीकरण यानाः यैं, यल, ख्वप, थिमि, चोभाः, नाला, दोलखाय् अवस्थित लोकेश्वर नापनापं यलया चुकबाहाःद्यःयात नं दुथ्याकाः अनुसन्धान यानादिल । नेपाःया नांजाःम्ह समाजशास्त्री प्रा. प्रयागराज शर्मा वय्कःया शोध-निर्देशक जुयादीगु खः । इलय् हे विद्यावारिधि क्वचाय्काः उपाधि नं कयादिल । विद्यावारिधिया उगु हे शोध-प्रबन्धयात परिमार्जन यानाः ईसं १९८० स नेपाल र एशियाली अनुसन्धान केन्द्रया लागि सहयोगी प्रकाशनपाखें *Karunamaya: The Cult of Avalokitesvara - Matsyendranath in the Kathmandu Valley of Nepal* नामं सफू पिथनादिल । थुगु सफुली वय्कलं अभिलेख, हस्तलिखित ग्रन्थ, अन्तर्वार्ता, अवलोकनया माध्यमं बुंगद्यः धैम्ह बौद्धद्यः 'लोकेश्वर' हे खः, हिन्दूतय्सं धाःथें 'मत्स्येन्द्रनाथ' मखु धैगु निष्कर्ष पिकयादीगु दु । थुकिया लागि वय्कलं *Avalokitesvara Becomes Matsyendranath* धैगु छगू अध्याय हे पयानादीगु दु । थुगु सफुली *Chronology of Cult* शीर्षकया अध्याय अतिकं महत्वपूर्ण जूगु दु । थुगु अध्यायस वय्कलं बुंगद्यःनाप सम्बन्धित घटनायात कालक्रमकथं माःहनाः तुलनात्मक विवेचना नं यानादीगु दु । थुगुसी विसं २०७२ सालय् तःभुखाय् ब्वयाः बुंगद्यःया रथजात्रा मोहनीन्हयः क्वचाय्के फइमखुला धैगु आशंका बलंगु खः । मोहनीन्हयः जात्रा क्वमचालकि बुंगद्यः ख्वपय् यंकेगु परम्परा दु, न्हापा ख्वपय् यंकूगु ऐतिहासिक प्रमाण दु धकाः थ्व हे सफूया पृष्ठ २७२ या पादटिप्पणीइ न्ह्यनातःगु खँयात कयाः सामाजिक संजालय् यक्व तर्कवितर्क जूगु खः । उकी लकं १०० दै न्हयः (सफू पिदंगु ईसं १९८० स्वयां १०० दैन्हयः) बुंगद्यःया जात्रा मोहनीन्हयः क्वमचाःगुलिं खतय् तयाः ख्वपय् यंकूगु दु धकाः च्वयादीगु खः । तर उगु खँयात पुष्टि याइगु छुं नं प्रमाण न्हयथनादीगु मदु ।

ईसं १९८५ स सहयोगी प्रकाशनपाखें हे लकया मेगु सफू *Buddhist Monasteries of Nepal: A*

*Survey of the Bahas and Bahis of Kathmandu* पिदन । थ्व सफुली स्वनिगः व स्वनिगलं पिने नालातकया दक्व बहाःबहीया सामान्य परिचय बियातःगु दु । अध्ययनया इवल्य थः हे बहाबहिली वनाः अनया अभिलेख स्वयाः, मनूतय्के न्यनेकने यानाः प्रत्येक बहाःबहीया ऐतिहासिक पृष्ठभूमि, भौतिक अवस्था, अन न्ह्यानाच्चंगु रितिथिति, गुथि, संघव्यवस्थाबारे प्रष्ट जुइक जानकारी बियादीगु दु । सफुली Hugh R. Downs या किपाः थौया दृष्टिकोणं स्वयंबल्य अतिकं मूल्यवान् जूवंगु दु । यक्व तधंगु क्षेत्र कःघानाः अध्ययन जूगुलिं थुकी बहाःबहीया विस्तृत अध्ययन जुइफयाच्चंगु मदु । उकिं लक थःहेसिनं हे व्यंग्य यासें थ्व सफूयात "बहाःबहीया फोन डाइरेक्टरी" धयादीगु दु । न्ह्याथे जूसां, लकं बहाःबहीया अध्ययनख्यल्य गुगु ज्या यानादिल, उकियात हाचांगाकथं मेगु कृति थौतक पिदंगु मदुनि । छुं नं बहाःबहीया अध्ययन याय्माःसा थ्व सफू मस्वःसें मगाःगु अवस्था आःतकं विद्यमान दनि ।

लकं सफू लिसलिसं अनुसन्धानमूलक च्वसु नं च्यादीगु दु । ईसं १९७५ स नेपाल २ एशियाली अध्ययन संस्थानपाखें पिदनीगु *Contributions to Nepalese Studies* जर्नलया दँ २, ल्याः २ स पिदंगु 'Newar Buddhist Initiation Rites' शीर्षकया च्वसु महत्वपूर्ण जू । यँया जनबहाल्य जूगु बरेछुइगु संस्कारया प्रत्यक्ष अवलोकन यानाः, अन्तर्वाता कयाः थुगु च्वसु च्यादीगु खः । थुगु च्वसुइ बरेछुइगु विधिसम्बन्धी हस्तलिखित ग्रन्थनाप जनबहाल्य थःम्हसिनं प्रत्यक्षस्व खंगु बरेछुइगु विधिया तुलनात्मक अध्ययन नं यानादीगु दु ।

ईसं १९८५ या नोवेम्बर महिनाय लण्डनया School of Oriental and African Studies स जूगु The Buddhist Heritage विषयया सेमिनारय लकं 'The Unique Features of Newar Buddhism' शीर्षकया कार्यपत्र न्ह्यब्वयादीगु खः । अन न्ह्यब्वःगु कार्यपत्रयात Tadeusz Skorupski जुं सम्पादन यानाः ईसं १९८९ स *The Buddhist Heritage* हे नां तयाः सफू नं पिकयादीगु दु । उगु च्वसुइ लकं नेपालय बौद्धधर्मया ऐतिहासिक पृष्ठभूमिया चर्चा यासें नेवाः

बौद्धधर्मय दुगु विशेषताया चर्चा यानादीगु दु । उकी वय्कलं नेवाः बौद्धधर्म धैगु तन्त्रवादं प्रभावित व हिन्दूधर्म त्वाकज्याःगु धर्म जक मखु, चीधंगु भौगोलिक क्षेत्रदुने कयकुनाः नं प्रभुत्वशाली हिन्दू समाजय प्ययपुनाच्चंगु धर्म (Embedded in a dominant Hindu society confined within a very small geographical area) धयादीगु दु । थुकी लकं विहारया संघव्यवस्था, संघपरम्पराय वःगु परिवर्तन, नेवाः बौद्धतय्गु संस्कार, नेवाः बौद्धधर्म नेपाःया कलावास्तुकलाया क्षेत्रय ब्यूगु योगदानया विवेचना यानादीगु दु ।

लकं रत्न पुस्तक भण्डारं पिकाइगु हिमाली क्षेत्रया भाषा, संस्कृतिसम्बन्धी अनुसन्धानमूलक पत्रिका *Kailash* या नं सम्पादन यानादीगु दु । थ्व पत्रिका दकल्य न्हापां ईसं १९७३ स नर्वेली अनुसन्धाता व Bibliotheca Himalayica या संस्थापक Hallvard Kuloy या सम्पादनय पिदंगु खः । ईसं १९७८ स लक कैलाशया सम्पादन पुचलय दुथ्यानादिल । ईसं १९७९ निसं १९९४ तक कैलाशया सम्पादन यानादिल । वय्कःधुंकाः प्रा. डा. कमलप्रकाश मल्लजुं कैलाशया सम्पादकया जिम्मेवारी बहन यानादिल । थुकिया नापनापं लकं त्रिभुवन विश्वविद्यालयस प्राध्यापन, शोध-निर्देशन व शोध-प्रबन्धया मूल्यांकन नं यानादिल ।

लकया निगू सफू *Karunamaya* व *Buddhist Monasteries of Nepal* या बजारय माग जुयाच्चंगुलिं निगूगु संस्करण पिकाय्माःगु आवश्यकता खनेदत । सफूया निगूगु संस्करण पिकाय्त लक थः हे न्ह्यचिलाः आपालं थासय संशोधनं यानाः पिकाय्त तयार जुइधुंकूगु खः । तर दुर्भाग्यवश लकयात क्यान्सर ल्वचं कल । करुणामय सफूयात पुनर्मुद्रण याय्त बैककया Orchid Press य तर्क छ्वयधुंकूगु खः । अथेसां सफू पिहांवःगु स्वयम्खक हे ७६ दँया उमेरय १८ मार्च २००९ स दिवंगत जुयादिल । वय्कःया स्याःन्याःम्ह पासा व सहकर्मी नांजाःम्ह इतिहासकार Ludwig Stiller छुं दिन्ह्यः जक मदुगु खः । लक मदयधुंकाः वय्कःया निगुलिं सफूया प्रकाशन दिनाच्चंगु दनि ।



लिखं

छम्ह ईसाई धर्मप्रचारक जुया: नं नेवा:तयगु धर्मप्रति नुग: क्वसाय्का: वय्कलं यानादीगु अनुसन्धान स्तुत्य जू । जन्म अमेरिकी जूसां नेपा:या नागरिक जुया:, नेपा:यात थ:गु कर्मभूमि दय्का:, नेपा:या विश्वविद्यालपाखें हे विद्यावारिधि यानादिल । थ:गु अनुसन्धानात्मक कृतिया कारणं नेवा: बौद्धधर्मया प्राज्ञिक इतिहासय् जोन लक अमर जुयादीगु दु । वय्क:धुंका: नेवा: बौद्धधर्मया अध्ययन यानादीपि David Gellner, Bruce Owens, Gregory Sharkey पिसं वय्क:यात गुरु नाला: सम्मान यानादीगु दु । नेवा: बौद्धधर्म अध्ययनया लागि वय्क:या सफू 'माष्टरपीस' जूगु दु । सुनां नं नेवा: बौद्धधर्मया अध्ययन याय्गु ख:सा वय्क:या कृति मस्व:सैं मगा: ।

गवाहलि ज्वलं

Dixit, Kanak Mani and Gregory Sharkey, 2009, 'The Passing of Two Jesuit Nepali Scholars: Ludwig Stiller, Historian and John K Locke, Scholar of Buddhism,' *Nepali Times*, 443:13 (20-26 March).


Owens, Bruce, 2011, 'Obituary for John K. Locke,' *Himalaya, the Journal of the Association for Nepal and Himalayan Studies*, 30:1:135-36.

Sharkey, Gregory, 2009, 'Scholar of the Newars: The Life and Work of John K. Locke', *Studies in Nepali History and Society*, 14:2: 423-40.

\*\*\*

## निपु मुक्तक

शक्ति महर्जन  
हकल्त्वा: यल



इस्त्री तय्त् इस्त्री क्वाका  
इस्त्री च्वं हे मच्चं  
काचाकाचां ल: हा:याना स्वयां  
इस्त्री क्वा हे मक्वा:  
जिन्दगीया मत च्याका स्वयां  
मत नं च्या हे मच्या:

◆◆◆

भूखाय ब्वल, चल: वन  
देशं विदेशं राहत वल  
धुकुतिइ राहत तय्थाय् मदु  
राहत इनेत राहत का:वन  
धुकुतिइ राहत द हे मदु

## हार्दिक बधाई व भिंतुना



नेपाल स्काउट, त्रि-पद्यम रोभर रेन्जर  
क्रयूया रोभर लिडर श्री गोपाल महर्जन,  
ललितपुर जिल्ला बुद्धिचाल संघया अध्यक्ष  
पदय् निर्वाचित जूगुलिं वय्क:यात  
यक्वयक्व बधाई व भिंतुना  
देछायाचवना ।

त्रि-पद्यम रोभर रेन्जर क्रयू परिवार  
ललितपुर